

ZAKON O DUHANU

I. OPĆE ODREDBE

Član 1.

Ovim zakonom uređuje se proizvodnja, otkup, obrada, prerada i promet sirovog duhana u listu, te proizvodnja i promet duhanskih proizvoda.

Pod duhanom u smislu ovog zakona podrazumijevaju se listovi kultivirane biljne vrste iz roda *Nicotiana tabacum* L. sa tipovima:

- virginija (Flue - Cured Virginia) sušena toplim zrakom,
- berlej (Burley) sušen u hladu,
- hercegovački ravnjak sušen na suncu.

Član 2.

Zbog privredne i fiskalne važnosti proizvodnje duhana i duhanskih proizvoda, Vlada Federacije Bosne i Hercegovine (u daljem tekstu: Vlada Federacije) će mjerama razvojne i ekonomske politike podsticati domaću proizvodnju, u okviru propisa i akata koji uređuju podsticanje domaće proizvodnje.

Član 3.

Odredbe ovog zakona o proizvodnji sirovog duhana u listu ne odnose se na naučne organizacije koje proizvode duhan u naučne ili ogledne svrhe.

II. PROIZVODNJA, OTKUP I OBRADA DUHANA

Član 4.

Proizvodnjom duhana, u smislu ovog zakona, smatra se proizvodnja duhanskog rasada, rasađivanje, radovi na duhanu u polju, berba, sušenje i proizvođačka manipulacija suhog duhana.

Otkupom duhana, u smislu ovog zakona, smatra se preuzimanje sirovog duhana u listu od proizvođača i procjena kvaliteta tog duhana.

Obradom (doradom) duhana, u smislu ovog zakona, smatra se sređivanje i industrijska fermentacija duhana, te druge radnje u tehnološkom postupku obrade i pakovanja duhana.

Član 5.

Proizvodnjom sirovog duhana u listu mogu se baviti fizička i pravna lica (u daljem tekstu: proizvođači) i privredna društva koja se bave otkupom i obradom (u daljem tekstu: obrađivači) i preradom duhana (u daljem tekstu: prerađivači), samostalno ili u međusobnoj saradnji, pod uvjetima određenim ovim zakonom i propisima donesenim na osnovu njega.

Član 6.

Fizička i pravna lica se mogu baviti proizvodnjom sirovog duhana u listu samo ako su prethodno zaključili sa obrađivačem pismeni ugovor o proizvodnji i isporuci sirovog duhana u listu.

Ugovor iz stava 1. ovog člana mora se zaključiti najkasnije do 31. maja godine u kojoj se vrši proizvodnja sirovog duhana u listu.

Član 7.

Obrađivač duhana može biti pravno lice koje je registrirano za obavljanje djelatnosti obrade duhana i koje je upisano u Registar obrađivača duhana kod Federalnog ministarstva poljoprivrede, vodoprivrede i šumarstva.

Član 8.

Obrađivači koji se bave i proizvodnjom sirovog duhana u listu dužni su u okviru svoje organizacije organizirati stručnu službu koja će pružati stručnu pomoć na zaštiti duhana od biljnih bolesti i štetočina za vlastitu proizvodnju kao i za proizvodnju fizičkih i pravnih lica sa kojima imaju zaključene ugovore o proizvodnji. U slučaju pojave biljnih bolesti ili štetočina obrađivač je dužan bez odlaganja organizirati zaštitu duhana proizvođačima iz stava 1. ovog člana.

Član 9.

Federalni ministar poljoprivrede, vodoprivrede i šumarstva pravilnikom propisuje uvjete za proizvodnju duhana i bilansiranje količina duhana za domaće potrebe i izvoz, na prijedlog strukovne asocijacije duhanske privrede.

Član 10.

Otkupom i obradom duhana mogu se baviti obrađivači koji su registrirani za obavljanje ove djelatnosti i koji ispunjavaju uvjete za obavljanje iste, kao što su: da raspolažu odgovarajućim prostorom za smještaj, čuvanje i obradu duhana, odgovarajućom tehnološkom opremom, stručnim kadrom kao i da osiguraju laboratorijske analize duhana.

Federalni ministar poljoprivrede, vodoprivrede i šumarstva pravilnikom propisuje uvjete koje moraju ispunjavati obrađivači za obavljanje djelatnosti otkupa i obrade duhana, na prijedlog strukovne asocijacije iz člana 9. ovog zakona.

Član 11.

Obrađivači su dužni da proizvodnju sirovog duhana u listu prijave kantonalnom organu uprave nadležnom za poljoprivredu, na čijem se području vrši proizvodnja, najkasnije do 15. jula godine u kojoj je izvršeno rasađivanje duhana. Prijava se podnosi u pismenoj formi a sadrži imena i adrese ugovornih strana, kao i podatke o broju rasađenih strukova, površini zemljišta i sortama zasađenog duhana. Kantonalni organ iz stava 1. ovog člana može propisati da prijava sadrži i druge potrebne podatke.

Član 12.

Proizvođači su dužni, ako se sami ne bave obradom duhana, zaključiti pismeni ugovor o isporuci sirovog duhana u listu sa obrađivačem.

Ugovor iz stava 1. ovog člana zaključuje se najkasnije do 31. maja godine u kojoj se vrši proizvodnja sirovog duhana u listu.

Ugovor o isporuci duhana iz stava 1. ovog člana mora sadržavati:

- 1) podatke o katastarskoj čestici i površini poljoprivrednog zemljišta na kojoj će se saditi duhan,
- 2) naziv tipa i sorte duhana koji će se saditi,
- 3) način na koji ugovorne strane osiguravaju sjeme odnosno duhanski presad,
- 4) obaveze u pogledu primjene mjera za suzbijanje biljnih bolesti i štetočina na duhanu i davanja reprodukcioni materijala,
- 5) cijenu proizvedenog duhana po klasama koju će obrađivač duhana platiti proizvođaču,
- 6) obavezu proizvođača da će u ugovorenom roku obrađivaču duhana sa kojim je zaključen ugovor o proizvodnji isporučiti sav proizvedeni duhan, te obavezu obrađivača duhana da će od njega preuzeti i platiti mu proizvedeni duhan,
- 7) izjavu proizvođača duhana da za isti vremenski period nije zaključio ugovor o proizvodnji duhana s drugim obrađivačem duhana za istu površinu iz tačke 1. ovog stava,
- 8) rok i mjesto predaje duhana.

Ugovor može sadržavati i druge elemente koje utvrde ugovorne strane a koji ne mogu biti u suprotnosti sa obaveznim elementima iz stava 3. ovog člana.

Član 13.

Proizvođači sirovog duhana u listu dužni su u toku vegetacije, omogućiti procjenu sirovog duhana u listu obrađivaču sa kojim su zaključili ugovor o proizvodnji duhana, radi utvrđivanja količina koje će se preuzeti. Procjena iz stava 1. ovog člana vrši se na parceli na kojoj je izvršeno sađenje duhana (duhanište).

Član 14.

Procjena kvaliteta proizvedenog sirovog duhana u listu vrši se pri njegovom preuzimanju, prema propisanim jedinstvenim mjerilima.

Mjerila za procjenu duhana u listu utvrđuje pravilnikom Federalno ministarstvo poljoprivrede, vodoprivrede i šumarstva, uz pribavljeno mišljenje strukovne asocijacije iz člana 9. ovog zakona, za srednjoročni period u skladu sa propisanim standardima kvaliteta sirovog duhana u listu.

Procjena duhana je javan čin i provodi se u prisustvu proizvođača duhana.

Član 15.

Procjenu količine i kvaliteta sirovog duhana u listu vrši obrađivač sa kojim je zaključen ugovor o proizvodnji i isporuci sirovog duhana u listu. Radnju procjene vrši procjenjivač koji ima odgovarajuću stručnu spremu dipl. inž. poljoprivrednog ili tehnološkog smjera i radno iskustvo u proizvodnji, otkupu ili obradi duhana u trajanju od najmanje tri godine.

Ukoliko obrađivač ne zapošljava lice iz stava 1. ovog člana procjenu vrši komisija iz člana 17. ovog zakona. O izvršenoj procjeni količine i kvaliteta duhana obrađivač iz stava 1. ovog člana izdaje proizvođaču duhana odvojene potvrde.

Potvrde iz stava 3. ovog člana služe kao dokazno sredstvo samo u slučaju kada je proizvođač saglasan sa procjenom.

Član 16.

Proizvođač duhana koji nije zadovoljan sa izvršenom procjenom sirovog duhana u listu u toku vegetacije radi utvrđivanja količine koja će se preuzeti može u roku od osam dana od dana dostavljanja potvrde iz člana 15. ovog zakona podnijeti zahtjev kantonalnom organu uprave nadležnom za poljoprivredu da se procjena količine duhana izvrši komisijskim putem.

Proizvođač duhana koji nije zadovoljan sa izvršenom procjenom kvaliteta sirovog duhana u listu može odmah zahtijevati da se procjena kvaliteta duhana izvrši komisijskim putem. Do komisijske procjene ovaj duhan se čuva odvojeno.

Član 17.

Sastav i način rada komisije iz člana 16. ovog zakona određuje kantonalni organ uprave nadležan za poljoprivredu na čijem je području proizveden sirovi duhan u listu.

U komisiju iz stava 1. ovog člana imenuju se najmanje po jedan predstavnik proizvođača duhana, obrađivača i organa koji imenuje komisiju.

Član 18.

Fizička i pravna lica koja se bave proizvodnjom sirovog duhana u listu dužna su sav proizvedeni sirovi duhan u listu isporučiti obrađivaču sa kojim su zaključili ugovor o proizvodnji i isporuci sirovog duhana u listu, a obrađivač je dužan preuzeti sav duhan proizveden na ugovorenoj površini.

Isporuka odnosno preuzimanje duhana vrši se u roku i mjestu određenom u ugovoru o proizvodnji i isporuci sirovog duhana u listu.

Član 19.

Obrađivač koji vrši otkup duhana dužan je odvojeno voditi evidenciju za svakog proizvođača duhana o količinama i sortama duhana preuzetog u smislu člana 18. ovog zakona.

Član 20.

Obrađivač koji vrši otkup je dužan da u roku od 15 dana od dana isteka roka za isporuku proizvedenog sirovog duhana u listu dostavi kantonalnom organu uprave nadležnom za poljoprivredu, spisak proizvođača duhana koji nisu isporučili ugovorene količine duhana.

Član 21.

Obrađivači su dužni da prijave sve količine ugovorenog i preuzetog sirovog duhana u listu kantonalnom organu uprave nadležnom za poljoprivredu, na čijem je području proizveden sirovi duhan u listu.

Obrađivač je dužan da proizvođačima izda potvrdu o preuzetim količinama sirovog duhana u listu.

Član 22.

Za proizvodnju rasada duhana može se upotrijebiti samo sjeme koje je proizvedeno po propisima o sjemenu koji se primjenjuju u Federaciji Bosne i Hercegovine (u daljem tekstu: Federacija) i dobiveno od otkupljivača duhana sa kojim je zaključen ugovor.

Član 23.

Zaštitnu cijenu duhana propisuje Vlada Federacije u tekućoj za narednu godinu, na prijedlog Federalnog ministarstva trgovine.

Vlada Federacije može uvoditi premiju kao podsticajnu mjeru za proizvodnju duhana.

Član 24.

Obrada sirovog duhana u listu vrši se po postupku i na način koji su propisani standardima koji se primjenjuju u Federaciji.

Član 25.

U promet se može stavljati samo obrađeni duhan.

Obrađeni duhan može se prodati samo privrednim društvima koja se bave preradom i trgovinom duhana radi izvoza.

Preradom duhana mogu se baviti pravna lica koja ispunjavaju uvjete određene članom 29. ovog zakona.

Član 26.

Privredna društva koja se bave obradom duhana mogu obrađeni duhan izvoziti u skladu sa propisima o vanjskotrgovinskom poslovanju.

Član 27.

Fizička i pravna lica ne smiju neovlašteno držati, koristiti, kupovati, prodavati ili na drugi način neovlašteno vršiti promet duhana u listu ili rezanog duhana.

III. PROIZVODNJA DUHANSKIH PROIZVODA

Član 28.

Pod proizvodnjom duhanskih proizvoda (cigarete, cigare, cigarilosi, duhan za lulu, duhan za pušenje, duhan za žvakanje i dr.) podrazumijevaju se radnje i tehnološki postupci kojim se dobijaju finalni duhanski proizvodi preradom duhana u listu, a to su: priprema i rezanje duhana, izrada cigareta, pakovanje u odvojivu i neodvojivu ambalažu i skladištenje do stavljanja u promet.

Član 29.

Proizvodnjom duhanskih proizvoda mogu se baviti pravna lica registrirana za obavljanje djelatnosti prerade duhana i proizvodnje duhanskih proizvoda kod nadležnog suda i koja ispunjavaju određene tehničko- tehnološke uvjete:

1. da raspolažu odgovarajućim prostorom za smještaj duhana i gotovih proizvoda;
2. da raspolažu odgovarajućom tehnološkom opremom u skladu sa kapacitetom proizvodnje;
3. da instalisana tehnologija osigurava sve faze proizvodnje od pripreme i rezanja duhana do izrade i pakovanja duhanskih proizvoda;
4. da raspolažu odgovarajućim laboratorijem za analizu i kontrolu duhanskih proizvoda;
5. da zapošljavaju odgovarajući stručni kadar.

Federalni ministar energije, rudarstva i industrije donosi Pravilnik o minimalnim tehničko-tehnološkim uvjetima koje moraju ispunjavati pravna lica iz stava 1. ovog člana.

Član 30.

Rješenje kojim se utvrđuje da proizvođač duhanskih proizvoda ispunjava uvjete iz člana 29. ovog zakona, donosi federalni ministar energije, rudarstva i industrije, na osnovu nalaza i mišljenja komisije iz stava 2. ovog člana.

Komisiju koja će utvrditi ispunjavanje uvjeta iz stava 1. ovog člana obrazuje federalni ministar energije, rudarstva i industrije, a čine je dva predstavnika Federalnog ministarstva energije, rudarstva i industrije i jedan predstavnik kantonalnog organa uprave nadležnog za oblast industrije na čijem je području sjedište proizvođača. Nalaz i mišljenje komisije ima karakter nalaza vještaka koji kao dokazno sredstvo služi za donošenje rješenja iz stava 1. ovog člana.

Protiv rješenja iz stava 1. ovog člana nije dozvoljena žalba ali se može pokrenuti upravni spor.

Član 31.

Za proizvodnju cigareta upotrebljava se isključivo duhan u listu, od kojeg se priprema duhanska mješavina, a koja se sastoji od domaćih i uvoznih duhana ili na njima temeljenih surogata (duhanska folija i tehnološki obrađeno rebro) koju određuje proizvođač u skladu sa propisima o standardizaciji.

Cigarete na tržištu Federacije razvrstavaju se na uvozne i domaće cigarete, a domaće cigarete se razvrstavaju na licencne i domaće cigarete.

Uvozne cigarete su cigarete koje su proizvedene van teritorije Bosne i Hercegovine. Na uvoznim cigaretama mora biti vidno istaknut naziv uvoznika i naljepljena nadzorna markica Federalnog ministarstva finansija - Federalnog ministarstva financija.

Licencne cigarete su cigarete koje se proizvode u Federaciji po licencnom ugovoru, a u skladu sa čl. 29. i 30. ovog zakona.

Domaće cigarete su cigarete koje se proizvode u domaćim fabrikama, koje ispunjavaju uvjete iz propisa o standardizaciji i koje su upisane u registar o markama duhanskih proizvoda.

Registar o markama duhanskih proizvoda vodi Federalno ministarstvo energije, rudarstva i industrije.

IV. NADZOR NAD PROVOĐENJEM ZAKONA

Član 32.

Nadzor nad provođenjem odredaba ovog zakona i propisa donesenih na osnovu njega o proizvodnji i obradi sirovog duhana u listu vrše Federalno ministarstvo za poljoprivredu, vodoprivredu i šumarstvo i kantonalni organi uprave nadležni za poljoprivredu u skladu sa Zakonom o upravi u Federaciji Bosne i Hercegovine ("Službene novine Federacije BiH", broj 28/97) i ovim zakonom.

Nadzor nad provođenjem odredaba ovog zakona i propisa donesenih na osnovu njega o prometu sirovog duhana u listu i obrađenog duhana vrše Federalno ministarstvo trgovine i kantonalni organi uprave nadležni za trgovinu.

Nadzor nad provođenjem odredaba ovog zakona i propisa donesenih na osnovu njega o tehničko - tehnološkim uvjetima koje moraju ispunjavati proizvođači duhanskih proizvoda vrši Federalno ministarstvo energije, rudarstva i industrije, u saradnji sa nadležnim kantonalnim organom za oblast industrije.

Član 33.

Poljoprivredni inspektor, pored ovlašćenja koja ima po propisima o poljoprivrednoj inspekciji, ovlašten je i da:

1. vrši pregled zemljišta na kome se proizvodi ili će se proizvoditi rasad duhana ili duhan u listu;
2. vrši pregled rasada duhana i duhana u listu u toku vegetacije;
3. naredi proizvođaču koji nije zaključio ugovor o proizvodnji i isporuci sirovog duhana u listu, odnosno obrađivaču koji nije podnio nadležnom kantonalnom organu uprave prijavu o proizvodnji duhana da u određenom roku izvrše te radnje.

Član 34.

Ako proizvođač duhana ne zaključi ugovor o proizvodnji i isporuci sirovog duhana u listu u roku koji je određen rješenjem poljoprivrednog inspektora, poljoprivredni inspektor će uz zahtjev za pokretanje prekršajnog postupka narediti i uništavanje rasada odnosno rasađenog duhana o trošku proizvođača ako i u naknadno ostavljenom roku po podnošenju prijave ne zaključi ugovor sa obrađivačem.

V. KAZNE NE ODREDBE

Član 35.

Novčanom kaznom od 5.000,00 KM do 30.000,00 KM, kaznit će se za privredni prijestup privredno društvo i drugo pravno lice:

- 1) ako se bavi proizvodnjom sirovog duhana u listu, a nije organizirao stručnu službu koja će vršiti zaštitu duhana od biljnih bolesti i štetočina (član 8.);
- 2) ako procjenu sirovog duhana u listu u toku vegetacije, radi utvrđivanja količine koja će se preuzeti, ne vrši na parceli na kojoj je izvršeno sadenje sirovog duhana u listu (član 13. stav 2.);
- 3) ako pri preuzimanju proizvedenog sirovog duhana u listu ne vrši procjenu kvaliteta prema propisanim mjerilima (član 14.);
- 4) ako ne preuzme sav duhan proizveden na ugovorenoj površini ili ako to ne učini u ugovorenom roku ili na ugovorenom mjestu (član 18.);
- 5) ako sav proizvedeni sirovi duhan u listu ne isporuči organizaciji koja se bavi obradom sirovog duhana u listu (član 18.);
- 6) ako ne vrši obradu sirovog duhana u listu po postupku i na način koji su propisani standardima koji se primjenjuju u Federaciji (član 24.);
- 7) ako obrađeni sirovi duhan u listu proda suprotno odredbi člana 25. stav 2. ovog zakona;
- 8) ako neovlašteno drži, koristi, kupuje ili na drugi način neovlašteno vrši promet duhana u listu ili rezanog duhana (član 27.).

Za privredni prijestup iz stava 1. ovog člana kaznit će se i odgovorno lice u privrednom društvu i drugom pravnom licu novčanom kaznom od 500,00 KM do 2.000,00 KM.

Član 36.

Za privredni prijestup iz člana 35. stav 1. tačka 8. uz novčanu kaznu izreći će se i zaštitna mjera oduzimanja duhana i drugih predmeta koji su upotrebljeni ili su bili namijenjeni za izvršenje privrednog prijestupa ili su nastali izvršenjem privrednog prijestupa.

Član 37.

Novčanom kaznom od 5.000,00 KM do 10.000,00 KM kaznit će se za prekršaj privredno društvo i drugo pravno lice:

- 1) ako proizvodi sirovi duhan u listu u saradnji sa fizičkim ili pravnim licima, a nema zaključen pismeni ugovor o proizvodnji i isporuci sirovog duhana u listu ili ako taj ugovor ne sadrži sve propisane elemente (član 6.);
- 2) ako kantonalnom organu uprave nadležnom za poljoprivredu ne prijavi u pismenoj formi proizvodnju sirovog duhana u listu u propisanom roku ili ako prijava ne sadrži sve propisane podatke (član 11.);
- 3) ako ne zaključi pismeni ugovor o isporuci sirovog duhana u listu sa obrađivačem duhana ili to ne učini u propisanom roku (član 12.);
- 4) ako ne omogući obrađivaču sa kojim je zaključio ugovor o proizvodnji i isporuci sirovog duhana u listu procjenjivanje duhana u toku vegetacije radi utvrđivanja količina koje će se preuzeti (član 13.);
- 5) ako ne izda odvojene potvrde o izvršenoj procjeni količine i kvaliteta sirovog duhana u listu (član 15. stav 2.);
- 6) ako ne vodi evidenciju o količinama i sortama duhana preuzetog u smislu člana 18. ovog zakona za svakog proizvođača duhana odvojeno (član 19.);
- 7) ako u propisanom roku ne dostavi kantonalnom organu uprave nadležnom za poljoprivredu spisak proizvođača duhana koji nisu isporučili ugovorene količine sirovog duhana u listu (član 20.);
- 8) ako kantonalnom organu uprave nadležnom za poljoprivredu ne prijavi sve količine ugovorenog i preuzetog sirovog duhana u listu (član 21.).

Za prekršaj iz stava 1. ovog člana kaznit će se i odgovorno lice u privrednom društvu i drugom pravnom licu, novčanom kaznom od 1.000,00 KM do 2.000,00 KM.

Član 38.

Novčanom kaznom od 500,00 KM do 1.000,00 KM kaznit će se za prekršaj fizičko lice:

- 1) ako proizvede sirovi duhan u listu bez prethodno zaključenog pismenog ugovora o proizvodnji i isporuci sirovog duhana u listu u propisanom roku ili ako taj ugovor ne sadrži sve propisane elemente (član 6.);

- 2) ako za jednu parcelu zaključi ugovor o proizvodnji i isporuci sirovog duhana u listu sa dva ili više obrađivača (član 12.);
- 3) ako ne omogući obrađivaču sa kojim je zaključio ugovor o proizvodnji i isporuci sirovog duhana u listu, procjenu duhana u toku vegetacije radi utvrđivanja količina koje će se preuzeti (član 13.);
- 4) ako sav proizvedeni sirovi duhan u listu ne isporuči obrađivaču sa kojim je zaključio ugovor o proizvodnji i isporuci sirovog duhana u listu ili ako to ne učini u ugovorenom roku ili na ugovorenom mjestu (član 18.);
- 5) ako neovlašteno drži, koristi, kupuje, prodaje ili na drugi način neovlašteno vrši promet duhana u listu ili rezanog duhana (član 27.).

Za prekršaj iz stava 1. tačka 5. ovog člana kaznit će se imalac radnje, novčanom kaznom od 500,00 KM do 2.000,00 KM.

Član 39.

Za prekršaj iz člana 37. stav 1. tačka 1. i člana 38. stav 1. tač. 1., 4. i 5. ovog zakona uz novčanu kaznu izreći će se i zaštitna mjera oduzimanja duhana i drugih predmeta koji su upotrebljeni ili su bili namijenjeni za izvršenje prekršaja ili su nastali izvršenjem prekršaja.

Član 40.

Novčanom kaznom od 8.000,00 KM do 10.000,00 KM kaznit će se za prekršaj privredno društvo:

- 1) ako započne proizvodnju duhanskih proizvoda bez prethodno dobijenog rješenja o ispunjenju propisanih tehničko-tehnoloških uvjeta (član 30.);
- 2) ako započne proizvoditi cigarete u suprotnosti sa članom 31. ovog zakona.

Za prekršaj iz stava 1. ovog člana kaznit će se i odgovorno lice u privrednom društvu, novčanom kaznom od 1.600,00 KM do 2.000,00 KM.

VI. PRIJELAZNE I ZAVRŠNE ODREDBE

Član 41.

Nadležna federalna ministarstva donijet će propise iz čl. 9., 10., 14. i 29. ovog zakona u roku od 60 dana od dana stupanja na snagu ovog zakona.

Član 42.

Fizička i pravna lica koja se bave djelatnostima obrade, prerade i prometa duhana i proizvodnje duhanskih proizvoda dužna su svoje poslovanje uskladiti sa odredbama ovog zakona najkasnije u roku od dvanaest mjeseci od dana stupanja na snagu ovog zakona.

Član 43.

Danom stupanja na snagu ovog zakona prestaje primjena propisa o duhanu i duhanskim prerađevinama koji su se primjenjivali na teritoriji Federacije do dana stupanja na snagu ovog zakona.

Podzakonski akti doneseni na osnovu propisa iz stava 1. ovog člana, koji su se primjenjivali na teritoriji Federacije, ostaju na snazi do donošenja propisa iz člana 41. ovog zakona.

Član 44.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući
Doma naroda
Parlamenta Federacije BiH
prof. dr Ivo Komšić, s.r.

ZAKON

O IZMJENAMA I DOPUNAMA ZAKONA O DUHANU

Član 1.

U Zakonu o duhanu ("Službene novine Federacije BiH", br. 45/02) u članu 31. stav 1. riječi: "u skladu sa propisima o standardizaciji" se brišu.

St. 2., 3., 4. i 5. mijenjaju se i glase:

"Cigarete na tržištu Federacije razvrstavaju se prema kvalitetu duhanskih mješavina i njihovim organoleptičkim svojstvima pri pušenju, tehničkoj izradi i opremljenosti cigareta, te prema oznaci cigareta.

Prema kvalitetu duhanske mješavine i organoleptičnim svojstvima pri pušenju razlikuju se cigarete koje se baziraju na mješavini neoromatičnih tipova duhana virginija sušena toplim zrakom i berlejš sušen u hladu, te hercegovačkog ravnjaka, kao i drugih tipova duhana.

S obzirom na tehničku izradu i opremljenost cigarete se razvrstavaju:

- prema omotu pakovanja na cigarete u tvrdom i mehkome pakovanju,
- prema ugrađenosti filtera na cigarete sa filterom i cigarete bez filtera.

Prema oznaci cigarete se razvrstavaju zavisno o mjestu proizvodnje i prvog stavljanja u promet pojedine marke cigareta."

Član 2.

Iza člana 31. dodati nove čl. 31.a, 31.b, 31.c i 31.d koji glase:

"Član 31.a

U skladu sa obilježjima iz člana 31. ovog Zakona, cigarete se razvrstavaju u tri grupe i to:

- grupa A – popularne cigarete,
- grupa B – standardne cigarete,
- grupa C – ekstra cigarete.

U grupu A spadaju cigarete sa i bez filtera pakovane u mehko pakovanje i koje sadrže najmanje 50% domaćih vrsta duhana (virginia, berlejš ili hercegovački ravnjak) u čemu je najmanje 25% donjih branja ili na njima zasnovanih surogata domaćeg porijekla (duhanska folija i tehnološki obrađeno rebro), a koje su proizvedene i prvi puta stavljene u promet na teritoriji Bosne i Hercegovine.

U grupu B spadaju cigarete s filterom pakovane u tvrdo pakovanje i koje sadrže najmanje 50% domaćih vrsta duhana (virginia, berlejš ili hercegovački ravnjak) u čemu je najmanje 15% donjih branja ili na njima zasnovanih surogata domaćeg porijekla (duhanska folija i tehnološki obrađeno rebro), a koje su proizvedene i prvi put stavljene u promet na teritoriji Bosne i Hercegovine.

U grupu C spadaju sve ostale cigarete koje ne ispunjavaju uvjete za cigarete iz grupe A i B.

Član 31.b

Razvrstavanje cigareta u odgovarajuće grupe regulira se Pravilnikom o razvrstavanju cigareta i markama, koje donosi federalni ministar energije, rudarstva i industrije.

Član 31.c

Cigarete na tržištu Federacije proizvedene van teritorije Bosne i Hercegovine moraju imati nalijepljenu nadzornu markicu Federalnog ministarstva finansija na kojoj je vidno istaknut i naziv uvoznika.

Član 31.d.

Kvalitet cigareta na tržištu Federacije, proizvedenih van teritorije Bosne i Hercegovine, mora biti provjerena prije carinjenja, odnosno stavljanja u promet u laboratoriji za analizu duhana i duhanskih preradevina akreditiranoj od Instituta za akreditiranje Bosne i Hercegovine.

Svaka pošiljka cigareta iz stava 1. ovog člana mora se podvrgnuti kontroli kvaliteta.

Do momenta akreditiranja laboratorije za analizu duhana i duhanskih preradevina iz stava 1. ovog člana ispitivanja će vršiti ovlaštena laboratorija.

Federalni ministar energije, rudarstva i industrije, uz saglasnost federalnog ministra zdravstva, daje ovlaštenje organizaciji koja će vršiti analizu duhana i duhanskih preradevina."

Član 3.

Zakon stupa na snagu narednoga dana od dana objave u "Službenim novinama Federacije BiH."

ZAKON O IZMJENAMA I DOPUNAMA ZAKONA O DUVANU

Član 1.

U Zakonu o duvanu ("Službene novine Federacije BiH", br. 45/02 i 42/04) u članu 7. na kraju teksta tačka se zamjenjuje zagradom i dodaju se riječi: "(u daljnjem tekstu: Federalno ministarstvo)".

Član 2.

Član 9. mijenja se i glasi:

"Federalni ministar poljoprivrede, vodoprivrede i šumarstva (u daljnjem tekstu: federalni ministar) pravilnikom propisuje uslove za proizvodnju duvana.

Federalni ministar na prijedlog strukovne asocijacije duvanske privrede, uz saglasnost Vlade Federacije, donosi bilans količina duvana za domaće potrebe i izvoz."

Član 3.

U članu 10. stav 2. i članu 14. stav 2. riječi: "poljoprivrede, vodoprivrede i šumarstva" brišu se.

Član 4.

U članu 29. stav 2. riječi: "energije, rudarstva i industrije" brišu se.

Član 5.

U članu 30. stav 1. riječi: "energije, rudarstva i industrije" brišu se.

Stav 2. mijenja se i glasi:

"Komisiju koja utvrđuje ispunjavanje uslova iz stava 1. ovog člana obrazuje federalni ministar a čine je dva predstavnika Federalnog ministarstva i po jedan predstavnik kantonalnog organa uprave i opštinskog organa uprave nadležnih za oblast duvanske industrije na čijem se području nalazi pogon za proizvodnju duvanskih proizvoda. Nalaz i mišljenje komisije ima karakter nalaza vještaka koje kao dokazno sredstvo služi za donošenje rješenja iz stava 1. ovog člana."

Član 6.

U članu 31. stav 6., čl. 31.b i 31.d stav 4. riječi: "energije, rudarstva i industrije" brišu se.

Član 7.

U članu 32. stav 1. riječi: "za poljoprivredu, vodoprivredu i šumarstvo" brišu se.

U stavu 3. riječi: "energije, rudarstva i industrije" brišu se a iza riječi "oblast" dodaje se riječ "duvanske".

Član 8.

Ovaj Zakon stupa na snagu narednog dana od dana objavljivanja u "Službenim novinama Federacije BiH"

